

# יואל

3 2 1

## הפרק 1

**ת** בר יהוה אשר היה אל יואל בן פתואל  
<sup>2</sup>שמעו זאת הזקנים והאיזנו כל יושבי הארץ ההיתה זאת בימיכם ואם בימי אבותיכם  
<sup>3</sup>עליה לבניכם ספרו ובניכם לבניהם ובניהם לדור אחר  
<sup>4</sup>יתר הגזם אכל הארבה ויתר הארבה אכל הילק ויתר הילק אכל החסיל  
<sup>5</sup>הקיצו שכורים ובכו והיללו כל שתי יין על עסיס כי נכרת מפיכם  
<sup>6</sup>כי גוי עלה על ארצי עצום ואין מספר שניו שני אריה ומתלעות לביא לו  
<sup>7</sup>שם גפני לשמה ותאנתי לקצפה חשף חשפה והשליך הלביו שריגיה  
<sup>8</sup>אלי כבתולה חגרת שק על בעל נעוריה  
<sup>9</sup>הכרת מנחה ונסך מבית יהוה אבלו הכהנים משרתי יהוה  
<sup>10</sup>שדד שדה אבלה אדמה כי שדד דגן הוביש תירוש אמלל יצהה  
<sup>11</sup>הבישו אכרים הלילו כרמים על חטה ועל שערה כי אבד קציר שדה  
<sup>12</sup>הגפן הובישה והתאנה אמללה רמון גם תמר ותפוח כל עצי השדה יבשו כי הביש ששון מן בני  
אדם  
<sup>13</sup>חגרו וספדו הכהנים הלילו משרתי מזבח באו לינו בשקים משרתי אלהי כי נמנע מבית אלהיכם  
מנחה ונסך  
<sup>14</sup>קדשו צום קראו עצרה אספו זקנים כל יושבי הארץ בית יהוה אלהיכם וזעקו אל יהוה  
<sup>15</sup>אאה ליום כי קרוב יום יהוה וכשד משדי יבוא  
<sup>16</sup>הלוא נגד עינינו אכל נכרת מבית אלהינו שמחה וגיל  
<sup>17</sup>עבשו פרדות תחת מגרפתיהם נשמו אצרות נהרסו ממגרות כי הביש דגן  
<sup>18</sup>מה נאנחה בהמה נבכו עדרי בקר כי אין מרעה להם גם עדרי הצאן נאשמו  
<sup>19</sup>אליך יהוה אקרא כי אש אכלה נאות מדבר ולהבה להטה כל עצי השדה  
<sup>20</sup>גם בהמות שדה תערוג אליך כי יבשו אפיקי מים ואש אכלה נאות המדבר

## הפרק 2

**ת** קעו שופר בציון והריעו בהר קדשי ירגזו כל יושבי הארץ כי בא יום יהוה כי קרוב  
<sup>2</sup>יום חשך ואפלה יום ענן וערפל כשחר פרש על ההרים עם רב ועצום כמהו לא נהיה מן העולם  
ואחריו לא יוסף עד שני דור ודור  
<sup>3</sup>לפניו אכלה אש ואחריו תלהט להבה כגן עדן הארץ לפניו ואחריו מדבר שממה וגם פליטה לא  
היתה לו  
<sup>4</sup>כמראה סוסים מראהו וכפרשים כן ירוצון  
<sup>5</sup>כקול מרכבות על ראשי ההרים ירקדון כקול להב אש אכלה קש כעם עצום ערוך מלחמה

<sup>6</sup> מפניו יחילו עמים כל פנים קבצו פארוה:  
<sup>7</sup> כגבורים ירצון כאנשי מלחמה יעלו חומה ואיש בדרכיו ילכון ולא יעבטון ארחותם  
<sup>8</sup> ואיש אחיו לא ידחקון גבר במסלתו ילכון ובעד השלח יפלו לא יבצעו  
<sup>9</sup> בעיר ישקו בחומה ירצון בבתיים יעלו בעד החלונים יבאו כגנב  
<sup>10</sup> לפניו רגזה ארץ רעשו שמים שמש וירח קדרו וכוכבים אספו נגהם  
<sup>11</sup> ויהוה נתן קולו לפני חילו כי רב מאד מחנהו כי עצום עשה דברו כי גדול יום יהוה ונורא מאד ומי  
יכילנו  
<sup>12</sup> וגם עתה נאם יהוה שבו עדי בכל לבבכם ובצום ובבכי ובמספד:  
<sup>13</sup> וקרעו לבבכם ואל בגדיכם ושובו אל יהוה אלהיכם כי חנון ורחום הוא ארך אפים ורב חסד ונחם  
על הרעה  
<sup>14</sup> מי יודע ישוב ונחם והשאיר אחריו ברכה מנחה ונסך ליהוה אלהיכם  
<sup>15</sup> תקעו שופר בציון קדשו צום קראו עצרה  
<sup>16</sup> אספו עם קדשו קהל קבצו זקנים אספו עוללים וינקי שדים יצא חתן מחדרו וכלה מחפתה  
<sup>17</sup> בין האולם ולמזבח יבכו הכהנים משרתי יהוה ויאמרו חוסה יהוה על עמך ואל תתן נחלתך לחרפה  
למשל בם גוים למה יאמרו בעמים איה אלהיהם  
<sup>18</sup> ויקנא יהוה לארצו ויחמל על עמו  
<sup>19</sup> ויען יהוה ויאמר לעמו הנני שלח לכם את הדגן והתירוש והיצהר ושבעתם אתו ולא אתן אתכם עוד  
חרפה בגוים  
<sup>20</sup> ואת הצפוני ארחיק מעליכם והדחתיו אל ארץ ציה ושממה את פניו אל הים הקדמני וספו אל הים  
האחרון ועלה באשו ותעל צחנתו כי הגדיל לעשות  
<sup>21</sup> אל תיראי אדמה גילי ושמחי כי הגדיל יהוה לעשות  
<sup>22</sup> אל תיראו בהמות שדי כי דשאו נאות מדבר כי עץ נשא פריו תאנה וגפן נתנו חילם  
<sup>23</sup> ובני ציון גילו ושמחו ביהוה אלהיכם כי נתן לכם את המורה לצדקה ויורד לכם גשם מורה ומלקוש  
בראשון  
<sup>24</sup> ומלאו הגרנות בר והשיקו היקבים תירוש ויצהר  
<sup>25</sup> ושלמתי לכם את השנים אשר אכל הארבה הילק והחסיל והגזם חילי הגדול אשר שלחתי בכם  
<sup>26</sup> ואכלתם אכול ושבוע והללתם את שם יהוה אלהיכם אשר עשה עמכם להפליא ולא יבשו עמי  
לעולם  
<sup>27</sup> וידעתם כי בקרב ישראל אני ואני יהוה אלהיכם ואין עוד ולא יבשו עמי לעולם  
<sup>28</sup> והיה אחרי כן אשפוך את רוחי על כל בשר ונבאו בניכם ובנותיכם זקניכם חלמות יחלמו בחוריכם  
חזיונות יראו  
<sup>29</sup> וגם על העבדים ועל השפחות בימים ההמה אשפוך את רוחי:  
<sup>30</sup> ונתתי מופתים בשמים ובארץ דם ואש ותימרות עשן  
<sup>31</sup> השמש יהפך לחשך והירח לדם לפני בוא יום יהוה הגדול והנורא  
<sup>32</sup> והיה כל אשר יקרא בשם יהוה ימלט כי בהר ציון ובירושלם תהיה פליטה כאשר אמר יהוה  
ובשרידים אשר יהוה קרא

### הפרק 3

**כ** י הנה בימים ההמה ובעת ההיא אשר אשוב את שבות יהודה וירושלם  
<sup>2</sup> וקבצתי את כל הגוים והורדתי אל עמק יהושפט ונשפטי עמם שם על עמי ונחלתי ישראל אשר  
פזרו בגוים ואת ארצי חלקו  
<sup>3</sup> ואל עמי ידו גורל ויתנו הילד בזונה והילדה מכרו ביין וישתו  
<sup>4</sup> וגם מה אתם לי צר וצידון וכל גלילות פלשת הגמול אתם משלמים עלי ואם גמלים אתם עלי קל

מהרה אשיב גמלכם בראשכם

<sup>5</sup> אשר כספי וזהבי לקחתם ומחמדי הטבים הבאתם להיכליכם

<sup>6</sup> ובני יהודה ובני ירושלם מכרתם לבני היונים למען הרחיקם מעל גבולם

<sup>7</sup> הנני מעירם מן המקום אשר מכרתם אתם שמה והשבתי גמלכם בראשכם

<sup>8</sup> ומכרתי את בניכם ואת בנותיכם ביד בני יהודה ומכרום לשבאים אל גוי רחוק כי יהוה דבר

<sup>9</sup> קראו זאת בגוים קדשו מלחמה העירו הגבורים יגשו יעלו כל אנשי המלחמה

<sup>10</sup> כתו אתיכם לחרבות ומזמרתים לרמחים החלש יאמר גבור אני!

<sup>11</sup> עושו ובאו כל הגוים מסביב ונקבצו שמה הנחת יהוה גבוריך

<sup>12</sup> יעורו ויעלו הגוים אל עמק יהושפט כי שם אשב לשפט את כל הגוים מסביב

<sup>13</sup> שלחו מגל כי בשל קציר באו רדו כי מלאה גת השיקו היקבים כי רבה רעתם

<sup>14</sup> המונים המונים בעמק החרוץ כי קרוב יום יהוה בעמק החרוץ

<sup>15</sup> שמש וירח קדרו וכוכבים אספו נגהם

<sup>16</sup> ויהוה מציון ישאג ומירושלם יתן קולו ורעשו שמים וארץ ויהוה מחסה לעמו ומעוז לבני ישראל

<sup>17</sup> וידעתם כי אני יהוה אלהיכם שכן בציון הר קדשי והיתה ירושלם קדש וזרים לא יעברו בה עוד:

<sup>18</sup> והיה ביום ההוא יטפו ההרים עסיס והגבעות תלכנה חלב וכל אפיקי יהודה ילכו מים ומעין מבית

יהוה יצא והשקה את נחל השטים

<sup>19</sup> מצרים לשממה תהיה ואדום למדבר שממה תהיה מחמס בני יהודה אשר שפכו דם נקיא בארצם

<sup>20</sup> ויהודה לעולם תשב וירושלם לדור ודור

<sup>21</sup> ונקיתי דמם לא נקיתי ויהוה שכן בציון